

Boa tarde, ha'u kontente bele partisipa iha seremonia lora ida ne'e nian. Ha'u nia respeitu ba Ministru Agrikultura no Pesca, Sua Exelénsia Joaquim Jose Gusmao dos Reis Martins.

Ha'u mós hakarak rekoñese ita-nia belun-sira husi Café Cooperativa Timor (CCT) – jerente jerál Señor Sisto Moniz Piedade, Señor Ross Brandon, no Señor Bency Issac.

Ha'u mós hakarak fó benvindu ba ami-nia kolega sira husi Departamentu Agrikultura Estados Unidos Amérika nian, Señor Chris Rittgers, ami-nia Asesór Agrikultura iha Embaixada Estados Unidos Amérika iha Jakarta, no Señora Niru Pradhan husi Departamentu Agrikultura Estados Unidos Amérika nian iha Washinton, D.C.

Estados Unidos Amérika kontribui ona ba desenvolvimento agrikultura iha Timor-Leste dezde molok Timor-Leste hetan nia independénsia.

Ami halo parseria ho Timor-Leste hodi bele atinje objetivu desenvolvimento mútua. Ho maneira ne'e, Estados Unidos Amérika nia programa-sira iha agrikultura kontribui ba Timor-Leste ida ne'ebé prósperu, saudável, demokrátiku no independente.

Iha ami-nia parseria ho Timor-Leste, Estados Unidos Amérika investe ona pelumenus dolar miliaun atus ida ruanulu resin lima (miliaun \$125) iha deit agrikultura. Ida ne'e hahú bainhira USAID ajuda lansa industria kafé iha tempu independénsia.

Estados Unidos Amérika nia parseria ne'ebé hatudu ho obra atuál Café Cooperativa Timor (CCT), realmente hahú iha tinan rihun ida atus sia ualu nulu - 1980. Estados Unidos Amérika - liuhusi USAID, no USDA - fornese ona infraestrutura, treinamentu, edukasaun, peskiza no desenvolvimento no asisténsia tékniku sira seluk tan.

Ami nia traballu iha agrikultura iha Timor-Leste apoia mós komunidadese-sira no uma-kain-sira. Ajuda sira hodi prepara di'ak liutan ba inserteza no rekupera lalais bainhira akontese dizastre.

USAID nia projetu-sira Avansa Agrikultura no Hasae Reziliénsia iha Oecusse hatudu oinsá hasae produsaun agrikultura sein halo degradasaun ba rai. Projetu-sira ne'e hatudu mós oinsá atu proteje fonte bee sira ne'ebé frájlil no hasae konsumidór no agrikultór-sira nia asesu ba bee moos no seguru.

Teknolojia foun rezulta iha armazenamentu ba kolleta ho di'ak liutan, kontinua produsaun iha tempu menus aihan, no menus problemas tanba bailoron, inundasaun ka infestasaun. Teknolojia foun mós prodús variedades kolletas ne'ebé rezistente ba rai-maran no moras. Ho maneira ne'e, Timoroan sira iha área rurál hetan rendimentus boot liutan.

Ema hotu hatene no vale apena repete katak kafé maka Timor-Leste nia SEGUNDU produktu esportasaun boot liu. Estados Unidos sente orgullu dezempeña ona papel apoiu hodi ajuda Timor-Leste atinje objetivu ne'e.

Ohin loron, prokura ba CCT nia produsos husi kompañia internasionál-sira sae ba beibeik, inklui husi Starbucks no Royal Coffe iha Estados Unidos América no Kicking Horse iha Kanadá, Heineken iha Olanda, no sira-seluk tan iha Austrália, Nova Zelandia, Indonézia, Alemaña, Finlândia, no Méxiku.

CCT atinje venda serkade dolar miliaun sanulu resin rua pontu lima (miliaun \$12.5). No serkade miliaun dolar sanulu resin ida (miliaun \$11) husi totál venda ne'e mai husi kafé.

Aleinde kafé, iha tinan hirak ikus ne'e, CCT adisiona tan aifarina, nomós baunilla, kravu, no espesiaría sira seluk. Agora CCT esporta ba Kompañia ho baze iha Estados Unidos - McCormick & Company, kompañia espesiaría boot liu iha América.

Ami sente orgullu tanba Timor-Leste nia kafé no espesiaría-sira disponivel ona iha meza matabixu no jantar Amerikanu sira nian.

Ami mós sente orgullu tanba ami-nia assisténsia iha ne'e kria daudaun parseria ne'ebé fó vantajen ba parte rua. Modelu parseria hanesan ne'e, sustentável liu fali forma ajuda internasionál sira seluk.

Ohin, ita marka konkluzan ba USDA nia Projetu Dezenvolvimentu Agronegósio iha Timor-Leste, investimentu ida ho montante dolar miliaun neen (miliaun \$6) ne'ebé ajuda lansa CCT nia negósio espesiaría iha tinan rihun rua sanulu resin tolu (2013). Kravus kontentór ida ne'ebé ohin ita haree iha ne'e, uluk liu tula ho ró esporta ba McCormick iha tinan rihun rua sanulu resin neen (2016).

Ne'e prosesu entrega ida, lá'os taka ona. Ami nia relasan ho CCT sei kontinua nafatin. Ami mós halo parseria ho Nova Zelandia iha CCT no ami orgullu ho kooperasan ne'e hodi apoia industria ne'ebé boot liutan iha Timor-Leste.

Obrigada ba ami-nia belun sira iha CCT, Embaixada Nova Zelandia, no iha USDA no USAID tanba halo ona parseria ho Timor-Leste. Ita hotu bele sente orgullu ho susesu ida ne'e.